

四庫全書

子部

欽定四庫全書

子部

御纂醫宗金鑑卷四十四

詳校官太醫院醫士臣程泰

編修臣倉聖脈覆勘

總校官中書臣朱鈐

校對官監生臣張曾炳

謄錄監生臣陳燦

欽定四庫全書

御纂醫宗金鑑卷四十四

編輯婦科心法要訣目錄

調經門

婦科總括

天癸月經之原

婦人不孕之故

月經之常

月經異常

外因經病

內因經病

不內外因經病

血色不正病因

氣穢清濁病因

愆期前後多少病因

經行發熱時熱

經行寒熱身痛

經行腹痛

經行瀉吐

錯經妄行成吐衄崩

經水過多無時下白帶

調經證治

四君子湯

異功散

六君子湯

香砂六君子湯

七味白朮散

參苓白朮散

歸脾湯

逍遙散

八珍湯

十全大補湯

雙和飲

人參養榮湯

理中湯

四物湯

桂枝四物湯

麻黃四物湯

柴胡四物湯

玉燭散

先期證治

芩連四物湯

地骨皮飲

膠艾四物湯

芩朮四物湯

桃紅四物湯

當歸補血湯

聖愈湯

薑苓四物湯

佛手散

過期證治

過期飲

雙和飲

聖愈湯

人參養榮湯

經行發熱時熱證治

加味地骨皮飲

六神湯

逍遙散

經行寒熱身痛證治

羌桂四物湯

逍遙散

黃耆建中湯

經行腹痛證治

當歸建中湯

加味烏藥湯

琥珀散

大溫經湯

吳茱萸湯

經行吐瀉證治

參苓白朮散

理中湯

七味白朮散

香砂六君子湯

錯經妄行吐衄崩證治

三黃四物湯

犀角地黄湯

經閉門

血滯經閉

血虧經閉

血枯經閉

經閉久嗽成勞

婦人經斷復來

室女經來復止

師尼室寡經閉

血滯經閉證治

三和湯

吳茱萸湯

琥珀散

四物湯

血枯血虧經閉證治

六味地黃湯

玉燭散

養榮湯

十全大補湯

經閉久嗽成勞證治

劫勞散

婦人經斷復來證治

芩心丸

益陰煎

十全大補湯

八珍湯

逍遙散

歸脾湯

室女師尼寡婦經閉證治

大黃廔蟲丸

澤蘭葉湯

栢子仁丸

逍遙散

婦病難治

診看婦人須先問經期妊娠

御纂醫宗金鑑卷四十四目錄

欽定四庫全書

御纂醫宗金鑑卷四十四

編輯婦科心法要訣

調經門

婦科總括

男婦兩科同一治所異調經崩帶癥嗣育胎前並產後
前陰乳疾不相同

註婦人諸病本與男子無異故同其治也其異於男

子者惟調經經閉帶濁崩漏癥瘕生育子嗣胎前產後諸病及乳疾前陰諸證不相同耳故立婦人一科以分門而詳治焉業是科者必先讀方脈心法諸書然後讀此自有豁然貫通之妙

天癸月經之原

先天天癸始父母後天精血水穀生女子二七天癸至任通衝盛月事行

註先天天癸謂腎間之動氣乃稟自父母資其始也

後天精血謂水穀之所化得之形成之後資其生也經曰女子一七而腎氣盛謂腎間動氣盛也二七而天癸至謂先天癸水中之動氣至於女子胞中也衝為血海任主胞胎衝任皆起於胞中所以任脈通太衝脈盛月事以時下故能有子也

婦人不孕之故

不子之故傷任衝不調帶下經漏崩或因積血胞寒熱痰飲脂膜病子宮

註女子不孕之故由傷其任衝也經曰女子二七而天癸至任脈通太衝脈盛月事以時下故能有子若為三因之邪傷其衝任之脈則有月經不調赤白帶下經漏經崩等病生焉或因宿血積於胞中新血不能成孕或因胞寒胞熱不能攝精成孕或因體盛痰多脂膜壅塞胞中而不孕皆當細審其因按證調治自能有子也

月經之常

月經三旬時一下兩月並月三居經一年一至為避年
一生不至孕暗經

註女子陰類也以血為主其血上應太陰下應海潮
月有盈虧潮有朝夕月經三旬一下與之相符故
又謂之月水月信也女子月經一月一行者其常
也或先或後乃其病也然亦有兩月一行謂之並
月者有三月一行謂之居經者有一年一行謂之
避年者有一生不行而依然能孕育謂之暗經者

此所稟之不同而亦非病不須治也

月經異常

經期吐血或衄血上溢妄行曰逆經受孕行經曰垢胎
受孕下血漏胎名

註婦女月經一月一下此其常也若經行而吐血衄
血上溢妄行者是謂逆經有受孕之後月月行經
而產子者是謂垢胎有受孕數月其血忽下而胎
不墮者是謂漏胎此皆月經之異乎常者也

外因經病

天地溫和經水安寒凝熱沸風溼然邪入胞中任衝損
婦人經病本同叅

註

經曰天地溫和則經水安靜天寒地凍則經水凝
泣天暑地熱則經水沸溢卒風暴起則經水波湧
而隴起六淫之邪入於胞中則損傷衝任故婦人
經病本此同叅也如寒則血凝熱則血沸風則血
溼然波湧而大下亦猶經水之被寒熱風而不得

安瀾也

內因經病

婦人從人不專主病多憂忿鬱傷情血之行止與順逆皆由一氣率而行

註婦人從人凡事不得專主憂思忿怒鬱氣所傷故經病因於七情者居多蓋以血之行止順逆皆由一氣率之而行也

不內外因經病

血者水穀之精氣若傷脾胃何以生不調液竭血枯病
合之非道損傷成

註
血者水穀之精氣也在男子則化為精在婦人則
化為血上為乳汁下為月水若內傷脾胃健運失
職飲食減少血無以生則經必不調亦有女子天
癸既至踰期不得與男子合未期思與男子合與
夫經正行時而合此皆合之非道亦致不調或過
淫合多則液竭產多乳衆則血枯亦皆能損傷陰

血致成經病也

血色不正病因

血從陽化色正紅色變紫黑熱之徵黃泔淡紅濕虛化更審瘀塊黯與明

註血屬陰從陽化故其色以正紅為正雖有經病亦

易為治也若色變深紅紫黑乃熱之徵也或黃如米泔乃濕化也淺淡紅白乃虛象也更當審其有瘀有塊色黯色明以治之若黯而紫黑兼見冷證

多屬寒凝若明而紫黑無見熱證多屬熱結也

氣穢清濁病因

熱化稠黏臭必穢寒化清澈臭則腥內潰五色有膿氣
時下而多命必傾

註凡血為熱所化則必稠黏臭穢為寒所化則必清

澈臭腥若是內潰則所下之物雜見五色似乎膿
血若更有臟腐敗氣且時下不止而多者是危證
也其命必傾矣

愆期前後多少

經來前後為愆期前熱後滯有虛實淡少為虛不脹痛
紫多脹痛屬有餘

註

經來或前或後謂之愆期皆屬經病經來往前趕
日不足三旬者屬血熱若下血多色深紅而濁則
為有餘之熱若下血少色淺淡而清則為不足之
熱也經來往後退日過三旬後者屬血滯若色淺
淡血少不脹痛者則屬氣虛血少澀滯不足之病

若色紫血多腹脹痛者則屬氣實血多瘀滯有餘之病也

經行發熱時熱

經行發熱時潮熱經前血熱經後虛發熱無時察客熱潮熱午後審陰虛

註經行發熱時熱潮熱之病若在經前則為血熱之

熱經後則為血虛之熱發熱時熱多是外感須察客邪之熱午後潮熱多屬裏熱當審陰虛之熱也

經行寒熱身痛

經來寒熱身體痛當分榮衛與虛實有汗不脹衛不足無汗而脹榮有餘

註

經來之時惡寒發熱身體疼痛者當分榮衛虛實若發熱惡寒身痛不脹而有汗者屬衛虛榮不足若發熱惡寒身脹痛而無汗者屬榮實衛有餘也

經行腹痛

腹痛經後氣血弱痛在經前氣血凝氣滯腹脹血滯痛

更審虛實寒熱情

註凡經來腹痛在經後痛則為氣血虛弱經前痛則為氣血凝滯若因氣滯血者則多脹滿因血滯氣者則多疼痛更當審其凝滯作脹痛之故或因虛因實因寒因熱而分治之也

經行瀉吐

經行泄瀉是脾虛鴨溏清痛乃寒濕胃弱飲傷多嘔飲食傷必痛吐其食

註

經行泄瀉乃脾虛也若鴨溏冷痛是寒濕也經行嘔吐是胃弱也若嘔出涎飲則是傷飲若吐出食物則是傷食然傷食者多痛而吐食傷飲者不痛而嘔飲也

錯經妄行成吐血崩

逆行吐血錯行崩熱傷陰陽絡妄行血多熱去當用補血少雖虛須主清

註婦女經血逆行上為吐血衄血及錯行下為崩血

者皆因熱盛也傷陰絡則下行為崩傷陽絡則上行為吐血衄也若去血過多則熱隨血去當以補為主如血少熱尚未減雖虛仍當以清為主也

經水過多兼時下白帶

多清淺淡虛不攝稠黏深紅熱有餘兼帶時下濕熱穢形清腥穢冷濕虛

註經水過多清稀淺紅乃氣虛不能攝血也若稠黏深紅則為熱盛有餘或經之前後兼赤白帶而時

下臭穢乃濕熱腐化也若形清腥穢乃濕痰寒虛所化也

調經證治

四君子湯

異功散

六君子湯

香砂六君子湯

七味白朮散

參苓白朮散

歸脾湯

逍遙散

八珍湯

十全大補湯

雙和飲

養榮湯

理中湯

補養元氣四君子參苓朮草棗生薑異功加陳兼理氣
虛痰橘半六君湯嘔吐香砂六君子渴瀉七味藿葛香
脾瀉參苓白朮散薏桔山蓮砂扁方思慮傷脾損心血
歸脾歸耆棗遠香減參加柴歸芍薄逍遙調肝理脾方
合物八珍兼補血耆桂十全大補湯去參苓朮雙和飲
去芎加陳養榮湯脾胃虛寒吐且瀉理中減苓加乾薑
註四君子湯補養元氣虛弱通用之方即人參茯苓
白朮炙草引用棗薑也異功散是於補氣中兼理

其氣即四君子湯加陳皮也六君子湯治脾虛痰
飲即四君子湯加橘紅半夏也香砂六君子湯治
胃虛嘔吐即六君子湯加藿香砂仁也七味白朮
散治脾虛渴瀉即四君子湯加藿香葛根木香也
參苓白朮散治脾胃虛瀉即四君子湯加薏苡桔
梗山藥蓮肉砂仁扁豆也歸脾湯治思慮損傷心
脾氣血即四君子加當歸黃耆棗仁遠志木香也
逍遙散調肝理脾即四君子湯減人參加柴胡當

歸白芍薄荷也八珍湯於補氣中兼補其血即四君子湯合四物湯也十全大補湯大補氣血即八珍湯加黃耆肉桂也雙和飲平補氣血即十全大補湯減人參茯苓白朮也人參養榮湯於補氣中專養榮血即十全大補湯減川芎加陳皮也理中湯治脾胃虛寒吐瀉即四君子湯去茯苓加乾薑也

四物湯

桂枝四物湯

麻黃四物湯

柴胡四物湯

玉燭散

婦人血病主四物歸芎白芍熟地黃血瘀改以赤芍藥
血熱易用生地黃表熱有汗合桂草表熱無汗合麻黃
少陽寒熱小柴並陽明熱合調胃湯

註四物湯乃婦人經產一切血病通用之方故主之

也其方即當歸川芎白芍藥熟地黄凡血瘀俱減
白芍藥改用赤芍藥破之血熱俱去熟地黄易用
生地黃涼之風感太陽衛分發熱有汗本方合桂
枝湯以桂枝甘草解之名桂枝四物湯寒傷太陽
榮分發熱無汗本方合麻黃湯以麻黃杏仁桂枝
甘草發之名麻黃四物湯邪傳少陽半表半裏往
來寒熱本方合小柴胡湯以柴胡黃芩半夏人參
甘草和之名柴胡四物湯邪傳陽明裏熱便結本

方合調胃承氣湯以大黃朴消甘草下之名玉燭
散

先期證治

芩連四物湯

地骨皮飲

膠艾四物湯

芩術四物湯

桃紅四物湯

當歸補血湯

聖愈湯

薑苓四物湯

佛手散

芎歸湯

先期實熱物苓連虛熱地骨皮飲丹血多膠艾熱苓朮
逐瘀桃紅紫塊黏血少淺淡虛不攝當歸補血歸耆先
虛甚參耆聖愈補熱滯薑苓丹附延逐瘀芎歸佛手散

又名芎歸效若仙

註經水先期而至屬熱而實者用四物湯加黃芩黃連清之名芩連四物湯屬熱而虛者用四物湯加地骨皮丹皮涼之名地骨皮飲血多無熱者用四物湯加阿膠艾葉止之名膠艾四物湯血多因熱者用四物湯加黃芩白朮和之名芩朮四物湯若血多有塊色紫稠黏乃內有瘀血用四物湯加桃仁紅花破之名桃紅四物湯先期血少淺淡乃氣

虛不能攝血也用當歸補血湯補之其方即當歸黃耆也若虛甚者則當用四物湯加人參黃耆補之名聖愈湯若血滯少其色赤者乃熱盛滯血用四物湯加薑黃黃芩丹皮香附延胡通之名薑芩四物湯逐瘀須用佛手散即四物湯去生地白芍又名芎歸湯逐瘀血其效如神也

過期證治

過期飲

過期血滯物桃紅附莪桂草木香通血虛期過無脹熱
雙和聖愈及養榮

註

經水過期不至因血氣凝滯脹痛者用過期飲其
方即四物湯加桃仁紅花香附莪朮肉桂甘草木
香木通也若過期不至並不脹痛者乃無血可行
是血虛也宜用雙和飲聖愈湯人參養榮湯

經行發熱證治

加味地骨皮飲

六神湯

經來身熱有表發內熱地骨加胡連經後六神加耆骨
逍遙理脾而清肝

註
經來發熱有表邪證者用前桂枝四物等湯發之
若內熱者用地骨皮飲加胡連清之名加味地骨
皮飲經後發熱乃血虛內熱用四物湯加黃耆地
骨皮補而涼之名六神湯若脾虛肝熱用逍遙散
理脾而清肝

逍遙散

方見前
調經門

經行身痛證治

羌桂四物湯

黃耆建中湯

經來身痛有表發無表四物羌桂枝經後血多黃耆建
耆桂芍草棗薑飴

註經來時身體痛疼若有表證者酌用前麻黃四物
桂枝四物等湯以發之若無表證者乃血脈壅阻

也宜用四物湯加羌活桂枝以疏通經絡名羌桂
四物湯若經行後或血去過多者乃血虛不榮也
宜用黃耆建中湯以補之其方即小建中湯桂枝
白芍甘草薑棗飴糖加黃耆也

經行腹痛證治

當歸建中湯

加味烏藥散

琥珀散

經後腹痛當歸建經前脹痛氣為殃加味烏藥湯烏縮
延草木香香附榔血凝礙氣疼過脹本事琥珀散最良
稜莪丹桂延烏藥寄奴當歸芍地黃

註

經後腹痛或去血過多乃血虛也宜用當歸建中
湯補之其方即小建中湯加當歸也經前腹脹痛
乃血氣凝滯若脹過於痛是氣滯其血也宜用加
味烏藥湯開之其方即烏藥縮砂延胡索甘草木
香香附檳榔也若痛過於脹是血凝礙氣也宜用

琥珀散破之其方即三稜莪朮丹皮官桂延胡索
烏藥劉寄奴當歸赤芍生地黃也

大溫經湯

吳茱萸湯

胞虛寒病大溫經來多期過小腹疼歸芍芍草人參桂
吳丹膠半麥門冬不虛胞受風寒病吳茱萸湯更加風
藁細乾薑茯苓木減去阿膠參芍芍

註凡胞中虛寒一切經病皆因經水來多胞虛受寒

所致或因受寒過期不行小腹冷痛者宜用大溫
經湯即當歸川芎白芍炙草人參肉桂吳茱萸丹
皮阿膠半夏麥門冬也若胞中不虛惟受風寒為
病宜吳茱萸湯依大溫經湯方更加防風藁本細
辛乾薑茯苓木香減去阿膠人參白芍藥川芎即
是吳茱萸湯也

經行吐瀉證治

經瀉參苓白朮散鴨瀉清痛理中湯肌熱渴瀉七味散

嘔飲香砂六君湯

註經來泄瀉乃脾虛也宜用參苓白朮散鴨瀉清
澈冷痛乃虛寒也宜用理中湯肌熱渴瀉乃虛熱也
宜用七味白朮散嘔飲痰水乃虛濕也宜用香砂
六君子湯

經行吐衄證治

三黃四物湯

犀角地黄湯

經前吐血為熱壅三黃四物大芩連經後吐血仍有熱
犀角地黄芍牡丹

註
經前吐血衄血乃內熱壅迫其血宜用三黃四物
湯瀉之其方即四物湯加大黃黃芩黃連經後吐
血衄血雖仍有熱亦不宜瀉但當用犀角地黄湯
清之其方即犀角生地黃赤芍藥牡丹皮也

調經門彙方

四君子湯

人參

白朮土炒

茯苓

錢各二

甘草一錢

右剉薑棗水煎服

異功散

人參

白朮土炒

茯苓

錢各二

甘草五分

陳皮

二錢

右剉加生薑水煎服

六君子湯

人參

白朮 土炒

茯苓

半夏

陳皮

各一錢

甘草

五分 炙

右剉薑棗水煎服

香砂六君子湯

即本方加藿香葉砂仁

七味白朮散

人參

白朮 土炒

茯苓

各一錢
五分

甘草

五分
炙

藿香

木香

乾葛

各一
錢

右剉水煎服

參苓白朮散

人參

白朮

土炒

茯苓

山藥

炒

甘草

蓮肉

去心

白扁豆

各一錢五分薑汁炒

薏苡仁

炒

砂仁

桔梗

各八分

右為細末每服二錢薑棗湯調服

歸脾湯

人參

黃耆

炙

白朮

土炒

茯神

當歸

龍眼肉

遠志

去心

棗仁

各一錢炒

木香

甘草各五分

右剉薑棗水煎服

逍遙散

當歸

酒洗

白芍

酒炒

白茯苓

柴胡

各一錢

甘草

五分

白朮

一錢

右剉散水一盞半加薄荷煎服

八珍湯

人參

白朮

土炒

茯苓

甘草

熟地

當歸

川芎

白芍

各等分

右加薑棗煎服

十全大補湯

人參

白朮

茯苓

黃耆

當歸

熟地

白芍

川芎

各一錢

肉桂

甘草

各五分

右薑棗水煎服

雙和飲

即十全大補湯去人參白朮茯苓

人參養榮湯

即十全大補湯去川芎加陳皮

理中湯

白朮

人參

乾薑

甘草 各一錢

灸

右剉水煎服

四物湯

熟地 二錢

川芎 一錢

白芍 二錢

炒

當歸 二錢

右為粗末水煎服

芩連四物湯

即本方加黃芩黃連

芩朮四物湯

即本方加黃芩白朮

桃紅四物湯

即本方加桃仁紅花

羌桂四物湯

即本方加羌活桂枝

柴胡四物湯

川芎

當歸

白芍

熟地

各一錢五分

柴胡

人參

黃芩

各二錢

甘草

五分

半夏

製二錢

右為末每五錢水煎服

玉燭散

當歸

川芎

熟地

白芍

錢各二

大黃

芒消

甘草

錢各一

右剉每服八錢水煎食前服

地骨皮飲

當歸

生地

錢各二

白芍一錢

川芎八分

牡丹皮

地骨皮

錢各二

水煎服

膠艾四物湯

熟地

當歸

川芎

白芍

阿膠

蛤粉末
炒成珠

艾葉

錢各一

甘草五分

炙

右剉水酒各半煎空心服

桂枝四物湯

當歸

熟地

川芎

各二錢

白芍

炒三錢

桂枝三錢

甘草

炒一錢

薑棗煎服

麻黃四物湯

當歸

熟地

白芍

川芎

錢各二

麻黃

桂枝

錢各一

杏仁

粒二十

甘草

錢一

薑棗煎服

當歸補血湯

當歸

錢三

黃耆

兩一
蜜炙

右水煎服

聖愈湯

熟地

酒拌蒸半日

白芍

酒拌

川芎

人參

各七錢五分

當歸

酒洗

黃耆

各五錢
灸

右水煎服

薑苓四物湯

當歸

熟地

赤芍

川芎

薑黃

黃芩

丹皮

延胡索

香附

各等分製

水煎服

佛手散

又名芎歸湯

川芎 二兩

當歸 三兩

右為細末每服二錢水一盞酒二分煎七分溫服

過期飲

熟地

白芍

炒

當歸

香附各二錢

川芎一錢

紅花七分

桃仁泥六分

蓬莪朮

木通各五分

甘草

炙

肉桂各四分

木香八分

右水二鍾煎一鍾食前溫服

加味地骨皮飲

生地

當歸

白芍 各二錢

川芎 八分

牡丹皮

地骨皮 各三錢

胡連 一錢

右水煎服

六神湯

熟地

當歸

白芍

川芎

黃耆

地骨皮 各等分

右咬咀水煎

小建中湯

白芍

炒 三錢

桂枝 一錢

甘草

灸 八分

右薑棗水煎服

黃耆建中湯

黃耆

灸

肉桂

各一兩

白芍

二兩
炒

甘草

七錢
炙

右每服五錢薑棗水煎服日二三服

如虛甚者加附子

當歸建中湯

當歸

一兩

白芍

二兩
炒

肉桂

一兩

甘草

七錢
炙

右呖咀每服三錢加生薑棗水煎空心服

加味烏藥湯

烏藥

縮砂仁

木香

延胡索

香附製

甘草

檳榔 各等分

右細剉每服七錢生薑三片水煎溫服

琥珀散

三棱

莪朮

赤芍

當歸

劉寄奴

丹皮

熟地

官桂

烏藥

延胡索 各一兩

右前五味用烏豆一升生薑半觔切片米醋四升
同煮豆爛為度焙乾入後五味同為末每服二錢
溫酒調下空心食前服

大溫經湯

吳茱萸
湯泡

丹皮

白芍

人參

肉桂

當歸

川芎

阿膠

碎炒

甘草

各一錢
炙

麥冬

二錢
去心

半夏

二錢半
製

右加生薑水煎食前服

吳茱萸湯

當歸

肉桂

吳茱萸

丹皮

半夏

製

麥冬 各二錢

防風

細辛

藁本

乾薑

茯苓

木香

炙甘草 各一錢

水煎服

三黃四物湯

當歸

白芍

川芎

生地

黃連

黃芩

大黃

右剉水煎服

大黃量虛實用

犀角地黄湯

芍藥 七錢半

生地 半觔

牡丹皮

一兩
去心

淨酒浸

犀角

一兩
如無

以川升麻代

右咬咀每服五錢水煎服

有熱如狂者加黃芩二兩

經閉門

血滯經閉

石瘕寒氣客胞中狀如懷子不經行胞閉熱氣迫肺欬傷心氣血不流通

註經曰石瘕生於胞中寒氣客於子門子門閉寒氣不得通惡血當瀉不瀉血以留止日以益大狀如懷子月事不以時下皆生於女子可導而下此論經閉因寒氣客於下故病血瘕而不病肺勞也經

曰月事不來者胞脈閉也胞脈者屬心而絡於胞中今氣上迫於肺心氣不得下通故月事不來也此論胞脈閉因熱氣攻於上故迫肺作欬病肺勞而不病血瘀也

血虧經閉

二陽之病發心脾不月有不得隱曲血枯其傳為風消息賁者死不能醫

註 二陽者陽明胃也女子有隱曲不得之情則心脾

氣鬱不舒以致二陽胃病飲食日少血無以生故
不月也血虛則生內熱愈熱愈虛肌肉乾瘦如風
之消物故名曰風消也火盛無制心乘肺金金氣
不行不能運布水精留於胸中津液悲化為痰咳
嗽不已日久成勞傳為息賁則不能醫矣息賁者
喘也

血枯經閉

脫血過淫產乳衆血枯漸少不行經骨蒸面白兩顴赤

懶食消瘦咳嗽頻

註失血過多而與爪甲之色俱淺淡黃白乃脫血病

也或因過淫精竭或因產多乳衆傷血血枯經來漸少二三月後經閉不行以致證見骨蒸肌熱面色枯白兩顴紅赤懶於飲食皮乾消瘦咳嗽頻頻不已多成虛損之證

久嗽成勞

男勞已詳心法內女損陰血傳風消或因病後素稟弱

經閉咳嗽血風勞

註

男子虛勞治法已詳於雜病心法要訣虛勞門內
女子之勞多因損其陰血或因病後傷其陰血或
因素稟陰血不足然必見陰虧骨蒸血枯經閉咳
嗽日久不已之證始名曰勞若不咳嗽則謂之虛
不可謂之勞也風消者古勞證名也女子曰血風
勞者蓋以內經曰勞風發於肺下是謂虛病之人
感受風邪則肺受之故始病必先咳嗽也若不先

解風邪而即補者未有不因久嗽不已而成勞者也故曰血風勞也

婦人經斷復來

婦人七七天癸竭不斷無疾血有餘已斷復來審其故邪病相干隨證醫

註婦人七七四十九歲時天癸竭地道不通當月水不下若月水不斷不見他證乃血有餘不可用藥止之若已斷或一年或三五年復來者當審其有

故無故是何邪所干隨證醫治也

室女經來復止

室女經來復不來若無所苦不為災必是避年未充足
若見虛形命可哀

註

室女年幼氣血尚未充足有經來數月復又不來
者若無他證所苦則不得謂之災疾必是避年或
氣血未充若無見虛損形狀則為室女血枯經閉
童勞多屬難治故曰命可哀也

師尼室寡經閉

師尼室寡異乎治不與尋常婦女同診其脈弦出寸口知其心志不遂情調經若不先識此錯雜病狀豈能明和肝理脾開鬱氣清心隨證可收功

註師道姑也尼女僧也室未適夫之女也寡少而亡夫之婦也異乎治者謂不與尋常婦女同其治也如診其脈弦出寸口則知其心志不遂情志之為病也凡欲調婦女一切經病若不先識此因則不

能明情志錯雜難名之病狀也治此證者當以和肝理脾開鬱清心隨證施治自可收功也

血滯經閉證治

三和湯

石瘕帶表吳茱萸攻理琥珀散最宜胞閉三和湯四物消黃連薄草苓梔

註寒氣客於胞中血留不行而成石瘕兼表證多者宜吳茱萸湯溫散之裏證多者宜琥珀散攻之胞

脈閉上迫於肺心氣不得下通故月事不來宜三和湯清之即四物湯合涼膈散乃樸消大黃連翹薄荷甘草梔子黃芩也如大便秘實者去消黃

吳茱萸湯

琥珀散

四物湯

方俱見前
調經門

血枯血虧經閉證治

六味地黃湯

胃熱燍血玉燭散失血枯養榮湯地黃湯治房勞損
黃藥苓丹澤地良乳衆血枯經若閉須用十全大補方

註經曰二陽之病發心脾女子不月二陽胃也胃熱

甚則燍其血血海乾枯故月事不下宜以玉燭散
泄其胃熱則經血自行若因素有吐衄之證或生
育過多則血海乾枯及房勞過傷陰血乳衆傷其
血液皆足以致經閉失血多者宜養榮湯主之房
勞過者以六味地黃湯滋之即山萸山藥白茯苓

丹皮澤瀉熟地黃也乳衆者以十全大補湯培補之

玉燭散

養榮湯

十全大補湯

俱見前調經門

經閉久嗽成勞證治

却勞散

月水不行蒸潮汗食減咳嗽血風勞却勞散用參苓芍

歸地甘耆半味膠

註經閉久嗽又見骨蒸潮熱盜汗自汗飲食減少之證則謂之血風勞宜用却勞散即人參茯苓白朮當歸生地甘草黃耆半夏五味子阿膠也

婦人經斷復來

芩心丸

益陰煎

經斷復來血熱甚芩心醋丸溫酒吞益陰知藥龜生地

縮砂灸草棗薑尋血多熱去傷衝任十全大補與八珍
暴怒憂思肝脾損道遙歸脾二藥斟

註婦人七七四十九歲後天癸不行若止而復來無
他證者乃血有餘不得用藥止之若因血熱者宜
芩心丸用黃芩心末二兩醋丸溫酒送下或用益
陰煎即知母黃蘗龜板生地縮砂灸草也若血去
過多熱隨血去衝任虛損其血不固者宜十全大
補湯八珍湯若因怒氣傷肝肝不藏血憂思傷脾

脾不攝血者宜於逍遙散歸脾湯二方斟酌用之

十全大補湯

八珍湯

逍遙散

歸脾湯

俱見前
調經門

室女師尼寡婦經閉證治

大黃廔蟲丸

澤蘭葉湯

栢子仁丸

室女經閉多血結大黃廔蟲桃杏仁蟲蛭蟻糟甘草芍
乾漆生地及黃芩不足澤蘭歸草芍栢子仁丸用栢仁
熟地澤蘭牛卷續相兼久服自然行師尼寡婦逍遙散
附蘭丹地鬱梔芩

註室女經閉多有氣血凝結者宜用大黃廔蟲丸破
血行氣其經自通方用大黃廔蟲桃仁杏仁蟲蟲
水蛭蟻糟甘草白芍乾漆生地黃芩蜜丸服若其

人虛弱不任攻下則用澤蘭葉湯即澤蘭葉當歸
甘草白芍也兼服栝子仁丸方用栝子仁熟地澤
蘭葉牛膝卷栝續斷丸服煎丸並進久久其血自
行至於師尼寡婦經閉之證多屬鬱熱宜用逍遙
散加香附澤蘭葉丹皮生地鬱金黑梔黃芩以和
肝理脾清心開鬱其經自通也

逍遙散

方見前
調經門

婦病難治

諺云婦病不易治蓋以幽居情鬱疑執拗不喜望聞問
諱疾忌醫術莫施

註冠宗奭曰寧治十男子莫治一婦人謂婦人之病
多不易治也蓋以婦人幽居情鬱憂患愛憎多疑
所懷不遂性執偏拗診時又不令醫師觀形望色
聞聲問病富貴之家居奧室之中處幃幔之內且
復以帕蒙手既不能行望色之神又不能盡切脈
之巧未免詳問問之覺繁反謂醫學不精往往並

藥不信不知問非易事非精於醫者必不能問也
夫望聞問切四者欲去其三即是神醫亦無由施
其術也此古今之通患謂之曰婦人不易治不誠
然哉

診看婦人須先問經期妊娠

未診婦人女子病先問經期與妊娠不詳誤藥非細事
疑似難明昧所因

註未診婦人女子之病必先問經期與有無妊娠若

不詳細審問倘用藥誤觸之則所關匪細多變生
他證疑似難明豈不昧其病之所因哉

經閉門彙方

三和湯

當歸

川芎

大黃

朴消

白芍

地黃

黃芩

梔子

連翹

薄荷

甘草

各等分

右剉每服八錢水煎服

六味地黃湯

熟地

八錢

山萸肉

山藥

各四錢

丹皮

澤瀉

茯苓

各三錢

右清水煎服

却勞散

白芍

六兩

黃耆

四兩
炙

甘草

炙

人參

去蘆

當歸

去蘆酒洗

熟地

洗淨焙乾

五味子

阿膠

各一兩
炒珠

右咬咀每服三錢水一盞生薑七片棗三枚煎至

九分溫服無時日三

苓心丸

用黃芩心枝條者三兩

米泔浸七日炙乾又浸又炙如此七次

右為末醋丸如桐子大每服七十九空心溫酒送

下日進二服

益陰煎

生地三錢

知母

黃蘗各二錢

龜板四錢
醋炙

縮砂仁

甘草各一錢
炙

右剉水煎服

大黃廩蟲丸

大黃

赤芍

生地

桃仁

杏仁

乾漆

甘草

廩蟲

蟲蟲

蛭蟲

蟻螬

黃芩 各等分

右末煉蜜丸每服丸數量虛實增減

澤蘭葉湯

澤蘭葉 三兩

當歸

白芍 各一兩

甘草 五錢

右為粗末每服五錢水二盞煎一盞溫服

栝子仁丸

栝子仁 炒另研

牛膝 酒洗


卷栝 各五錢

澤蘭葉

續斷 各二兩

熟地 三兩五錢酒浸半日
石白內杵成膏

右為細末煉蜜丸如桐子大空心米飲下三十丸



御纂醫宗金鑑卷四十四

欽定四庫全書

子部

御纂醫宗金鑑卷四十五

詳校官太醫院醫士臣程泰

編修臣倉聖脈覆勘

總校官中書臣朱鈐

校對官監丞臣張曾炳

謄錄監生臣李錦

欽定四庫全書

御纂醫宗金鑑卷四十五

編輯婦科心法要訣目錄

崩漏門

崩漏總括

崩漏證治

荆芩四物湯

加味四物湯

膠艾四物湯

琥珀散

八珍湯

十全大補湯

益氣養榮湯

補中益氣湯

益胃升陽湯

調經升陽除濕湯

失笑散

地榆苦酒煎

帶下門

五色帶下總括

帶下證治

吳茱萸湯

補中益氣湯

六君子湯

六味地黃湯

歸脾湯

四物湯

清白散

四君子湯

導水丸

萬安丸

威喜丸

固精丸

加味四物湯

逍遙散

癥瘕積痞瘰癧諸證門

癥瘕積聚痞瘀血血蠱總括

癥瘕證治

大七氣湯

食癥證治

烏藥散

血癥證治

血竭散

痞證治

助氣丸

積聚證治

開鬱正元散

瘀血血蠱證治

桃奴散

失笑散

玉燭散

疔癖疔證總括

疔癖證治

葱白散

疔病證治

當歸散

治諸積大法

嗣育門

胎孕之原

男女完實

種子時候

分男女論

雙胎品胎

鯀見有子

胎男女論

辨別孕病

分經養胎

受孕分房靜養

安胎母子二法

胎前用藥三禁

安胎審宜調治

御纂醫宗金鑑卷四十五目錄

欽定四庫全書

御纂醫宗金鑑卷四十五

編輯婦科心法要訣

崩漏門

崩漏總括

淋瀝不斷名為漏忽然大下謂之崩紫黑塊痛多屬熱
日久行多損任衝脾虛不攝中氣陷暴怒傷肝血妄行
臨證審因須細辨虛補瘀消熱用清

註

婦人經行之後淋瀝不止名曰經漏經血忽然大
下不止名為經崩若其色紫黑成塊腹脇脹痛者
屬熱瘀若日久不止及去血過多而無塊痛者多
係損傷任衝二經所致更有憂思傷脾脾虛有不
能攝血者有中氣下陷不能固血者有暴怒傷肝
肝不藏血而血妄行者臨證之時須詳審其因而
細細辨之虛者補之瘀者消之熱者清之治之得
法自無不愈

崩漏證治

荊芩四物湯

崩漏血多物膠艾熱多知栢少芩荊漏瀼香附桃紅破
崩初脹痛琥珀攻日久氣血衝任損八珍大補養榮寧
思慮傷脾歸脾治傷肝逍遙香附青

註

崩血漏血去血過多者宜用膠艾四物湯補之如
屬熱多者宜用知藥四物湯清之熱少者宜用荊
芩四物湯和之若漏血瀼少此屬血滯宜用四物

湯加香附桃仁紅花破之若崩血初起脹痛此屬
瘀凝宜用琥珀散攻之崩漏日久氣血已虧衝任
傷損者宜用八珍湯十全大補湯人參養榮湯量
補其損傷若因思慮傷脾者宜用歸脾湯補之志
怒傷肝者宜用逍遙散加炒香附青皮平之

膠艾四物湯

四物湯

琥珀散

八珍湯

十全大補湯

人參養榮湯

歸脾湯

逍遙散

方俱見前調經彙方內

補中益氣湯

益胃升陽湯

氣陷補中益氣舉保元升柴歸朮陳益胃升陽加苓麴

腹痛加芍藥減參

註

崩漏日久脾傷食少中氣下陷不能載血者宜用
補中益氣湯益胃升陽湯升舉之補中益氣湯即
人參黃耆甘草保元湯加升麻柴胡當歸白朮陳
皮也益胃升陽湯即補中益氣湯加黃芩神麴也
若腹痛者宜加芍藥有熱者用黃芩無熱者用
肉桂調之咳嗽者肺熱也減人參

調經升陽除濕湯

夾水水瀉不甚弱調經升陽除濕湯耆草升柴歸蒼朮
羌獨藁本蔓荊防

註

崩漏下血夾水或日水瀉一二次形氣不甚弱者
宜用調經升陽除濕湯其方即黃耆甘草升麻柴
胡當歸蒼朮羌活獨活藁本蔓荊子防風也以風
藥先勝其濕若形氣虛弱者則當加入人參陳皮合
補中益氣湯補中勝濕可也

失笑散

地榆苦酒煎

殺血心痛失笑散蒲黃五靈脂定疼崩血不已防滑脫
地榆苦酒煎止崩

註

崩血心腹痛甚者名曰殺血心痛乃血滯不散宜
用失笑散其方即蒲黃五靈脂也先定其痛痛止
然後隨證治之若崩血補之仍然不止者當防其
滑脫宜用地榆一兩醋煎露一宿次早溫服立止
止後隨證治之名地榆苦酒煎

崩漏門彙方

補中益氣湯

黃耆

人參

白朮

甘草

各一錢
炙

當歸

陳皮

各七分

升麻

柴胡

各三分

右剉薑棗水煎服

益胃升陽湯

黃耆 二錢

人參 一錢
有嗽去之

神麴 一錢五分
炒

白朮 三錢

當歸 酒洗

陳皮

甘草 各一錢
炙

升麻

柴胡 各五分

生黃芩 二錢
秋涼不用

右為麤末每服三錢或五錢如食添再加之如食

減只服三錢或更減之不可多服水煎去滓熱服

升陽除濕湯

黃耆

蒼朮

羌活

各一錢五分

防風

藁本

升麻

柴胡

甘草

各一錢

獨活

五分

蔓荊子

七分

右咬咀水五大盞煎至一大盞去滓稍熱服空心服畢待少時以早膳壓之

失笑散

五靈脂

蒲黃

各等分

右為末先用醋調二錢熬膏入水一盞煎至七分食前熱服良驗

地榆苦酒煎

地榆

一兩

醋煎露一宿次蚤溫服立止止後隨證調治之酒

也

即醋

帶下門

五色帶下總括

帶下勞傷衝與任邪入胞中五色分青肝黃脾白主肺
衄血黑腎赤屬心隨人五臟兼濕化治從補瀉燥寒溫
更審瘡膿瘀血化須別胞膀濁與淫

註帶下者由於勞傷衝任風邪入於胞中血受其邪

隨人藏氣濕熱濕寒所化故色青者屬肝為風濕
色赤屬心為熱濕色黃屬脾為虛濕色白屬肺為

清濕色黑屬腎為寒濕也其從補從瀉從燥從滑
從寒從溫則隨證治之更審其帶久淋瀝之物或
臭或腥穢乃敗血所化是胞中病也若似瘡膿則
非瘀血所化是內癰膿也若如米泔兼尿竅不利
乃膀胱白濁病也若尿竅通利從精竅出或如膠
黏乃胞中白淫病也

帶下證治

邪入胞中吳茱萸赤黏連梔青防梔白主益氣黑六味

黃淡六君或歸脾

註帶下因六淫之邪入於胞中者宜吳茱萸湯若色赤色黃而濁黏者熱也色黃者加黃連梔子色青者加防風梔子若色白色黑而清稀者虛寒也色白者用補中益氣湯色黑者用六味地黃湯色黃而淡者宜六君子湯或加味歸脾湯分證調治可也

吳茱萸湯

補中益氣湯

六味地黄湯

六君子湯

歸脾湯

方俱見首卷彙方

加味四物湯

胞中冷痛乃寒濕四物附子桂薑宜臭腥兼合知藥用
久滑升柴龍牡脂

註帶下而胞中熱痛乃熱濕也今胞中冷痛乃寒濕

也宜四物湯加川附子炮薑官桂服之日久滑脫者加升麻柴胡舉之龍骨牡蠣赤石脂瀉之

四物湯

方見前調經門彙方內

清白散

帶下濕熱清白散四物薑炭草蘼椿赤榆荊苓濕二朮滑加龍牡久合君

註

帶下五色帶下也皆濕熱所化宜用清白散其方即四物湯加薑炭甘草黃蘼椿皮也色赤加地榆

荊芥黃芩濕加蒼朮白朮滑加龍骨牡蠣久則合

四君子湯也

四物湯

四君子湯

俱見前調經門彙方內

導水丸

萬安丸

帶下有餘皆濕化少腹脹疼污水綿導水牽滑芩軍熱

萬安牽椒茴木寒

註

五色帶下皆從濕化若少腹脹痛污水綿綿屬濕熱者宜用導水丸其方即牽牛滑石黃芩生軍治熱有餘也屬濕寒者宜用萬安丸其方即牽牛胡椒小茴香木香治寒有餘者也

威善丸

固精丸

瘀化瘡膿濁淫病虛實寒熱酌其宜威善蠟苓固精菟韭味桑苓龍牡脂

註

帶下有因瘀血所化或瘡瘍膿出及白濁白淫者
皆帶下類也其虛實寒熱當酌其宜藥用威喜丸
即黃蠟茯苓也固精丸即菟絲子韭菜子五味子
桑螵蛸茯苓龍骨牡蠣赤石脂也

帶下門彙方

清白散

當歸

黃蘗

鹽水泡

白芍
炒

樗根皮
酒炒

生地

川芎

貝母 各一錢

炮薑

甘草 各五分

右剉生薑三片水煎服

導水丸

牽牛

頭末

滑石

水飛

黃芩

川大黃

右末蒸餅為丸量虛實服

萬安丸

牽牛

頭末

胡椒

木香

小茴香

焙 各等分

右末水泛為丸量虛實服

威喜丸

白茯苓

四兩去皮作塊用猪苓二錢半同於磁器內煮二十餘沸出晒乾不用猪苓

黃蠟

四兩

右以茯苓為末煉黃蠟為丸如彈子大空心細嚼

滿口生津徐徐咽服以小便清為度忌米醋只喫
糠醋忌動氣

固精丸

牡蠣煨粉

菟絲子酒蒸焙

韭子炒

龍骨

五味子

白茯苓

桑螵蛸酒炙

白石脂各等分

右為末酒糊丸如桐子大每服七十九空心鹽湯

下

癥瘕痞諸證門

癥瘕積聚痞瘀血血蠱總括

五積六聚分藏府七癥八瘕氣血凝癥積不動有定處
瘕聚推移無定形痞悶不宣氣壅塞未成堅塊血瘀名
蓄久不散成血蠱產後經行風冷乘

註

五臟氣積名曰積故積有五證六府氣聚名曰聚
故聚有六證難經有心肝脾肺腎五藏之積而無
六聚蓋以積為血病而聚為氣病也故李杲有五

積丸方治法巢氏病源載七癥八瘕但有八瘕名證而無七癥病形其他方書亦不概見大抵又以癥為氣病而瘕為血病也夫病皆起於氣必氣聚而後血凝不必過泥於黃青燥血脂狐蛇鱉等名但以牢固不移有定處者為癥為積推移轉動忽聚忽散者為瘕為聚可也故曰癥者徵也言有形可徵也瘕者假也言假物成形也若夫痞者痞悶不通氣道壅塞之謂也瘀血者血瘀腹中未成堅

塊也蓄之既久必成血蠱矣凡此諸證皆由新產之後經行之時不知謹避以致風冷外襲邪正相搏結於腹中而成也

癥瘕證治

大七氣湯

婦人一切癥瘕病上下攻疼七氣湯藿香益智稜莪朮甘結青陳肉桂香

註婦人一切癥瘕隨氣上下攻築疼痛者宜大七氣

湯其方即藿香葉益智仁京三稜蓬莪朮甘草桔
梗青皮陳皮肉桂心木香也

食癥證治

烏藥散

經行產後食生冷臟氣相搏結塊形牢固不移日漸長
開滯消積溫散行烏藥散烏朮莪朮木香當歸青桂心
註婦人經行產後貪食生冷之物與臟氣互相搏聚
結成堅塊牢固不移日漸長大者治宜開滯消積

用烏藥散即烏藥桃仁莪朮木香當歸青皮桂心
以溫散之自愈

血癥證治

血竭散

乘臟虛兮風冷干飲食內與血相搏因成血癥堅牢固
脇腹脹痛熱而煩少食多忘頭汗出血竭歸芍蒲桂延
註婦人產後經行之時臟氣虛或被風冷相干或飲
食生冷以致內與血相搏結遂成血癥牢固不移

脇腹脹痛內熱心煩食少善忘但頭汗出者宜用
血竭散即血竭當歸赤芍蒲黃桂心延胡索也

痞證治

助氣丸

三焦痞滿胸膈悶氣不宜通助氣清白朮三稜蓬朮
枳殼檳榔香與陳

註婦人胸膈痞悶謂之痞由於氣壅不宜所致宜助

氣丸即青皮白朮三稜義朮枳殼檳榔木香陳皮

為丸服也

積聚證治

開鬱正元散

積聚通用正元散
苓朮青陳麴麥延香砂海粉查甘桔
痰飲食積血氣搏

註

五積六聚乃痰飲食積氣血搏結而成通用開鬱
正元散其方即茯苓白朮青皮陳皮神麴麥芽延
胡索香附砂仁海粉山查甘草桔梗也用以健脾

消食化痰滲飲理氣和血則積聚未有不愈者矣
瘀血血蠱證治

桃奴散

腹中瘀血未成形面黃發熱腹脹疼產後經來風冷客
血室之內有瘀停產後惡露失笑散經閉瘀凝玉燭攻
血蠱桃奴緞鼠糞延桂砂桃附五靈

註婦人產後經行之時傷於風冷則血室之內必有

瘀血停留未成堅塊故不名癥瘕也其人必面色

萎黃臍腹脹痛內熱晡熱若產後惡露不行者宜
失笑散若經閉不通瘀血凝聚者宜玉燭散瘀血
不行蓄之既久必成血蠱宜用桃奴散即桃奴綴
鼠糞延胡索桂心砂仁桃仁香附五靈脂也綴鼠
糞一名兩頭尖即雄鼠屎桃奴即桃樹上未成不
落之乾桃子也

失笑散

方見首卷崩漏

玉燭散

方見首卷彙方內

疰癰疽證總括

臍旁左右一筋疼突起如弦疰證名僻在兩肋名曰癰
高起如山疰病稱必引少腹腰脇痛三證皆由風冷成
或作或止因寒發痛時方見不痛平

註婦人臍之兩旁有筋突起疼痛大者如臂小者如

指狀類弓弦者名曰疰癰在兩肋之間者名曰癰
若小腹牽連腰脇疼痛高起者謂之疰名雖有三
其實皆因風冷客於胞中而然故其發作皆因再

受風冷發則痛痛則見不痛則平復如初也

瘕癖證治

葱白散

婦人瘕癖腹肋痛風冷血氣結而成葱白四物參苓枳
桂朴薑香青莪稜茴香麴麥苦楝子葱鹽煎服訶黃斟
註婦人瘕癖腹肋疼痛者皆因風冷與氣血搏結而

成宜用葱白散溫散之其方即四物湯加人參茯
苓枳殼肉桂厚朴乾薑木香青皮莪朮三稜茴香

神麴麥蘖苦楝子葱白食鹽煎服也大便結燥去鹽加大黃如大便自利加訶子

四物湯

方見首卷彙方內

疝病證治

當歸散

婦人疝病氣攻冲脇腹刺痛當歸芍藥甲吳萸桃仁芍桂榔青木大黃蓬

註婦人疝病攻衝刺痛多因風冷寒濕客於胞門血

室故其病皆屬厥陰肝經宜當歸散即當歸川芎
鱉甲吳茱萸桃仁赤芍肉桂檳榔青皮木香大黃
蓬莪朮也

治諸積大法

形虛病盛先扶正形證俱實去病急大積大聚衰其半
須知養正積自除

註凡治諸癥積宜先審身形之壯弱病勢之緩急而
治之如人虛則氣血衰弱不任攻伐病勢雖盛當

先扶正氣而後治其病若形證俱實宜先攻其病也經云大積大聚衰其半而止蓋恐過於攻伐傷其氣血也羅天益曰養正積自除可謂得經旨者矣

癥瘕積痞血蠱門彙方

大七氣湯

三稜

莪朮

各煨切

青皮

去穰

陳皮

去白

木香

藿香

益智仁

桔梗

肉桂

甘草
炙 各七錢半

右咬咀每服五錢水二盞煎至一盞食前溫服

烏藥散

烏藥

莪茂

桂心

當歸
炒

桃仁

青皮

木香

各等分

右為末每服二錢熱酒調下

血竭散

真血竭

如無紫礦代當歸

赤芍

蒲黃

延胡索

右等分研細頻篩再研取盡為度每服一錢用童便合好酒半大盞煎一沸溫調下方產下時一服

上牀良久再服其惡血自循經下行不致衝上免
生百病

助氣丸

京三稜

蓬莪茂

二味各用濕紙包灰火中煨透切片各二觔

青皮

去白

陳皮

去白

白朮

各十五兩

枳殼

麩炒去穰

檳榔

木香

各十兩

右為末糊丸桐子大每服五十九滾水下

開鬱正元散

白朮

陳皮

青皮

香附

山查

海粉

桔梗

茯苓

砂仁

延胡索

麥芽

甘草

神麴

炒
各等分

炒

炙

右剉每服一兩生薑三片水煎服

桃奴散

桃奴

雄鼠糞

炒兩頭尖者是

延胡索

肉桂

五靈脂

香附

砂仁

桃仁

各等分

右為末每服三錢酒調下

葱白散

當歸

熟地

赤芍

川芎

人參

茯苓

枳殼

肉桂

厚樸

乾薑

木香

青皮

莢茂

三稜

茴香

神麴

麥芽

苦楝子 各等分

右末加葱白三寸食鹽五分煎服三錢
大便結燥去鹽加大黃便自利加訶子

當歸散

當歸

川芎 各二錢

鱉甲

三錢
醋炙

吳茱萸

桃仁 十五粒

赤芍

肉桂 各一錢

檳榔

青皮

各八分

木香

莢茂

川大黃

各七分

右為末每服一錢水一盞入乾燕脂一錢同煎六分食後服

嗣育門

胎孕之原

天癸先天生身氣精血後天化成形男子二八天癸至屬陽應日精日盈女子二七天癸至屬陰應月血月通男女媾精乃有子乾道男成坤女成

註

天癸乃父母所賦先天生身之真氣也精血水穀所化後天成形之本也男子二八先天腎氣盛天癸至與後天所生之精會合而盈然男子屬陽陽

應日故精盈而日舉也女子二七先天腎氣實天
癸至與後天所生之血會合而盛然女子屬陰陰
應月故血盛而月下也所以至期男女媾其先天
真氣後天精血陰陽會和乃能有子也當此陰陽
會合時陽盛自然成男是乾道成男也陰盛自然
成女是坤道成女也

男女完實

精通必待三十聚天癸二十始適人皆欲陰陽完實後

育子堅壯壽偏增

註

男子十六而精通必待三十而娶女子十四而天
癸至必待二十而嫁者皆欲陰陽完實然後交而
孕孕而育育而其子必堅壯長壽也今未笄之女
天癸始至已近男色則陰氣早瀉未完而傷未實
而動所以雖交而不孕孕而不育育而其子必脆
弱不壽也

種子時候

男子聚精在寡慾交接乘時不可失須待細縕時候至
樂育難忍是真機

註聚精之道惟在寡慾交接女子必乘其時不可失
之遲早蓋婦人一月經行一度之後必有一日細
縕之時氣蒸而熱如醉如痴有欲交接不可忍之
狀乃天然節候是成胎生化之真機也

分男女論

精血先後分男女或以奇偶少多分或以子宮左右定

是皆不曉箇中因欲識此中真消息乾道陽男坤女陰

註

分男女之說先賢有以血先至裏精則成男精先至裏血則成女精血散分並裏則為駢胎品胎之原者有以月水盡後一三五日成男二四六日成女與夫經水斷後一二日成男四五日成女者有以受氣於左子宮成男受氣於右子宮成女者皆各執一見殊為不曉此中因也蓋獨男獨女之胎可以日數論駢胎品胎或男或女亦可以日數論

乎稽之史載一產三子四子有半男半女或男多
女少男少女多者則一三五日為男二四六日為
女之說不可憑矣抑豈有一日受男而二日復受
女之理乎丹田命門也在男子曰精室在女子曰
子宮形如合鉢並無兩岐可分曰左右則是有兩
子宮矣此說尤屬不經然則何以定之亦惟以會
合天人陽盛乾道成男陰盛坤道成女斯足為確
論耳

雙胎品胎

古以雙胎精氣盛不成男女或兼形陰陽變常駁氣盛事之所有理難明

註

古以雙胎乃精氣有餘岐而分之血因分而攝之故也若男同孕者剛日陽時也女同孕者柔日陰時也男女同孕者剛日陰時或柔日陽時也其他或有不成男女男不可為父女不可為母與男女之兼形者又皆陰陽變常駁氣所感事之所有理

之所無莫可稽考者也

鯀見有子

少陰動甚知有子陰搏陽別尺寸憑但搏不滑胎三月搏而滑石五月形

註

少陰督鯀動甚者有子鯀也但當憑其兩尺陰鯀搏指有力兩寸陽鯀不搏指而別於兩尺斯為有子鯀無疑也其但搏不滑者主三月之胎搏而滑者主五月之胎也

胎男女辨

上小下大女腹箕中正圓高男腹釜右疾為女左疾男胎氣鍾於陰陽主

註

上小下大如箕之形蓋以女胎面向母腹其足膝抵腹故有是形也中正圓高如釜之形蓋以男胎面向母背則背脊抵腹故有是形也右手屬陰脈疾為女左手屬陽脈疾為男是胎氣鍾於陰則右盛主女鍾於陽則左盛主男也

辨別孕病

孕病不分須診乳五月之後乳房升何以知其母子吉
身雖有病脈和平

註婦人經水不至不分是孕是病者五個月之後以
孕婦乳房辨之若乳房升大有乳者是胎若乳房
不大無乳者是病也凡孕婦有病其險可知亦何
以知其母子俱吉惟診其脈象和平則雖有病知
均吉無慮也

分經養胎

分經養胎不足憑無所專養論不經形始未分無不具
陰陽之道漸分形

註

巢元方曰妊娠一月名胚胎足厥陰脈養之二月
名始膏足少陽脈養之三月名始胎手心主脈養
之當此時血不流行形象始化四月始受水精以
成血脈手少陽脈養之五月始受火精以成氣足
太陰脈養之六月始受金精以成筋足陽明脈養

之七月始受木精以成骨手太陰脈養之八月始受土精以成膚革手陽明脈養之九月始受石精以成毛髮足少陰脈養之十月五藏六府關節人神皆備又有推巢元方養胎之說謂四時之令必始於春所以一月二月間是足厥陰少陽木也三月四月間是手厥陰少陽火也五月六月間是太陽陽明土也七月八月間是手太陰陽明金也九月十月間是少陰太陽水也惟手少陰太陽二經無所

專養者以君主之官無為而已此說更為不經夫
男女交接精血聚而成胚此孕形之始也雖未分
身軀藏府而其理無不具也猶太極渾然包羅萬
象而陰陽之一氣氤氲浸漸化生而成子母分形
自然而然如草木成熟殼脫蒂落也

受孕分房靜養

受孕分房宜靜養謹戒食味使脾安調其喜怒防驚恐
慎厥起居避風寒

註
受孕之後分房靜養恐動相火致生胎毒謹戒飲
食五味使其脾胃調和母之氣血易生子之形成
必育內調七情外避風寒起居安順不持重用力
不安逸多睡不登高涉險則母無病子亦安矣

安胎母子二法

安胎之道有二法母病胎病要詳分母病動胎但治母
子病致母審胎因

註
安胎之道有二法母病胎病當詳分而施治也凡

因母病以致胎動者但療其母母安則胎自安或
因胎病有所觸動以致母病者但宜安胎胎安則
母自愈矣

胎前用藥三禁

胎前清熱養血主理脾疎氣是為兼三禁汗下利小便
隨證虛實寒熱看

註

丹溪曰胎前當清熱養血為主恐傷陰血也理脾
脾健則氣血易生疎氣氣順則氣血調和理脾疎

氣兼以清熱養血則胎自安矣三禁者汗下利小便也蓋恐過汗亡陽傷氣過下亡陰傷血利小便傷津液也然又當隨證詳審表裏虛實寒熱以施其治不可過峻也

安胎審宜調治

形瘦不宜過熱品體盛補氣恐動痰安胎芩朮為要藥佐以他藥任抽添火盛倍苓痰倍朮血虛四物氣四君杜續膠艾胎不穩氣盛蘇腹枳砂陳

註

形瘦之人多火過用溫熱則傷陰血肥盛之人多痰過於補氣恐壅氣動痰白朮消痰健脾條芩清熱養陰二味為安胎要藥若有他證則以藥佐之或減白朮加條芩或加白朮減條芩任其抽添如火盛則當倍芩以清火痰盛則當倍朮以消痰血虛則合四物湯以補血氣虛則合四君湯以補氣胎不安穩更佐以杜仲續斷阿膠艾葉以安之若氣盛胎高則加紫蘇大腹皮枳殼砂仁陳皮以舒

之

四物湯

四君子湯

方俱見首卷彙方內

嗣育門彙方

加味地黃丸

治婦人經水不調必不能受孕即使受之亦不全美

宜常服此方

熟地

四兩

山萸肉

山藥

各二兩

牡丹皮

白茯苓

各一兩五錢

澤瀉

香附

各一兩
童便浸三次

右為末煉蜜丸如梧子大每服七十九白沸湯送

下

滌痰湯

治婦人肥盛者多不受孕以身中有脂膜閉塞子宮
也以此湯送後九藥

當歸 一兩

茯苓 四兩

川芎 七錢五分

白芍藥

白朮 土炒

半夏 製

香附米

陳皮

甘草 各一兩

右作十貼每貼薑三片水煎吞後丸子

滌痰丸

白朮 二兩
土炒

半夏麴

川芎

香附米 各一兩

神麴炒

茯苓 各五錢

橘紅 四錢

甘草 二錢

右為末粥丸每服八十九如熱者加黃連枳實 各一兩

大補丸

治婦人瘦弱多由血少不能受孕宜常服此方

天冬 去心

麥冬 去心

菖蒲

茯苓

人參

益智仁

枸杞子

地骨皮

遠志肉

右為細末煉蜜丸如桐子大空心酒下三十九

從蓉菟絲子丸

此方不寒不熱助陰生子

肉從蓉

一兩三錢

覆盆子

蛇床子

川芎

當歸

菟絲子 各一兩二錢

白芍藥

一兩

牡蠣

鹽泥固煨

烏鰂魚骨 各八錢

五味子

防風

各六錢

條芩

五錢

艾葉

三錢

右為末煉蜜丸如桐子大每服三四十九鹽湯下

早晚皆可服

調經丸

理氣養血調經種子

香附

川杜仲

八兩
薑汁炒

大川芎

白芍藥

當歸

去尾

懷生地

陳皮

小茴香

酒炒

延胡索

畧炒

肉蓯蓉

酒炒

舊青皮

麩炒

台烏藥

炒

枯黃芩


酒炒

烏鰂魚骨

以上各四兩
酥炙

右十四味稱足真正好醋和麴打糊為丸如梧桐
子大每服百丸空心好酒送下

一方無陳皮地黃有人參黃耆各二兩



御纂醫宗金鑑卷四十五